


1537
(Summari) № 2006
Türken.



278


Ein Summari der

Türckischen Botschafft Werbung/
an die Herrschafft zu Venedig/in Welscher
sprach beschehen/sampt des Venes
dischen Senats gegebne
Antwort.

Copia aus Brieffs dem Cardinal von
Neapolis zugeschickt/inhaltend die anzahl
der Türckischen Armada vnd kriegß
volcks zu Ross vnd Fuß
wider Italien.

Zu Venedig getruckt/ vnd setze
von wort zu wort verteutsche.

M. D. XXXVII.



Summari der Türckischen Botschafft
Werbung/ an die Herrschafft
zu Venedig.

Durchleüchtigster Herzog / vnnnd Durchleüchtigste
Herren Venediger / auff das ich von disem großmäch-
tigen Senat lauter verstanden werd / sag ich das der glück-
seligst / loblichst / vnnnd vnüberwindlichst Suldan Suliz-
man Kayser zu Constantinopel / vnd Tribizonz / Suldan
zu Egypten vnnnd Syria / König aller König / Herr aller
Herren vnd Potentaten der welt / des ganzen Meers her-
scher vnd innhaber / Sein Vater / Anher / vnd Vranher /
haben allzeyt handtgehabt / frid / freündtschafft / glauben
vñ verbündtnuß / mit Ewr Durchleüchtigste Herrschafft /
haben jr gedient vnd wilgefahren in allen iren notdurfften /
haben iren Kaufleuten gut recht mitgetailt / vñ sy mit iren
gewaffeten Galeen durch den ganzen Orient zuschiffen
zügelassen / vñ fürsehung gethon zu zeyten der allergrößten
theürungen mit Victualien für Luch vnd Lwere vnder-
thonen / außserhalb ainiger beschwärmuß.

Verzo ersüch ich Luch Herrn Venediger / wie jr bey ewe-
rem zusagen verbunden seyt / das jr wöllet inn des Türcki-
schen Kayfers gesellschaft / freünd seiner freünd / vñ seynd
seiner seynd sein / dann er in allweg sein höchste macht aufs
Erdrich setzen / Carlen Spanischen König / gantzlich ver-
derben / außreüten vnnnd vertreyben will / auß dem Könige-
reich Neapolis / Siciliam / Sardinien / vnnnd endtlich auß
ganzem Italien / souil er des innen hatt / vnd das alles ein-
geben vnnnd zu Herren machen seinen aller liebsten Brüder
FRANCISCVM den erstē / König zu Franckreich / des
in gedachter Carl / mehr durch betrug dan macht beraubt.
Die Türckisch Hochhait was entschlossen disen zug zuthun
zur zeit als sein brüder gefangen was / Als er aber vernam /

Das ain solliche Schwagerschafft gemacht was zwischen
inen/stünd er dem ab/ dieweil sein hochhait anders nichts
begert/ dan das ain yeder allain besitze vnd innen hab/ das
im von rechtswegen gebürt vnd züsteht.

Vnd damit jr versteht wie hoch der Türckisch Kayser zu
disem fürnemen erhizigt vñ begirig ist/ sag ich euch gewiß-
lich an/ das er allberait über grosse fürsehung gethon hat/
vnd ist nu zumal entschlossen zu wasser vñ land zu passiern
in Italien mit großmächtigster vnd wolfürsehener heers-
Krafft/ so er gerüst bey ainander hat/ vnd wil abziehen zum
newen Monscheyn des Merzen zu Constantinopel/ vñnd
sich verfügen gen Valona/ alda sich versamen/ wirdet die
vñzällich vnd mächtig Armada / zu schaden vnd entlicher
aufstilgung Carln König zu Spanien.

Dieweil aber mein Herz der Kayser nit vor hatt durch
Ewere Stett/ Flecken vnd Porten fräuenlich zu passiern/
so lät er Euch auch neben im zu disem seinem fürnemen/
vñnd das jr wölt seinem glückhaftigsten / mächtig-
sten vñ vnüberwindlichstem Kriegsvolck ain
freyen paß/ vnd wa es die notdurfft erfor-
dern wurd / Victualien durch Ewer
Stet/ dergleichen durch die gans
zen Herrschafft Ewers
Durchleüchtigsten
Senats ver-
günnen.

Der Herrschafft zu Venedig gegebne ant-
wort / obgedachter des grossen
Türcken Botschafft.

DEn frid / zusagen / vnd bündnuß / die wir haben mit
der Hochhait deins Kayfers / vnüberwindlichsten
Künigs vnd Herren / wollen wir inn alle weg handthaben
vnd erhalten / Aber ime hilff zuthun wider die Chriſten / ist
weder gedingt noch Capituliert / vnd vil weniger ain bil-
liche forderung / darumb abschlagen wir die ſelben . Wir
haben frid mit dem KAISER / Wir haben frid mit dem
KONIG von Franckreich / der allenthalben vnueruckte
gehalten wirt / Vnd begeben vns nit / weder hilff noch für-
derung zuthun / jr kainen . Fürſehen vnſere Stett / Por-
ten / vnd Meerflecken . Wir wollen inhalten vnd zusehen .
Wollen den belaidigen / der vnns vnderſteht laid zuthun /
Vnd vns ferner oder weyter diſes heerzugs / vnd jrer krieg
nit einlaſſen / ſonder das vnſer beſchützen .

Diſe gegebne antwort widerſacht der Türckiſch Orator /
vnd abſchied faſt übel zuſriden .

Copia ains Sendbrieffes an Cardinal zu
Neapels / inhaltend des grossen
Türcken Kriegsrüstung.

Hochwürdigster Fürst / gestern ſeind etliche Kaufleut
mit iren ſchiffen von Constantinopel hie ankömen /
etlich ire freünd die inn der Türcken hend waren / zulöſen /
vnd bringen auch ettliche Kauffmanschafft / ſein zu Con-
stantinopel abgeſaren auff 28. Decembriſ / den man mag
glauben geben / dieweil ſy ſich vergleichen etlichem ſchreibē
vnſern Herrn in diſe Stat zugeſchickt .

Vnd erstlich als wir sy fragten / was Kriegsvolck's der
Türck dise zeyt hett / antworten sy / das am Weynachts tag
gemustert wären zu Andinopel 200000. pferdt. Zu Con-
stantinopel / Gallipoli vnd Rhodis wären mehr dann
150000. pferdt / vnd möchten sein zu Ross vnd füß gezalt
bey 600000. person / aufferhalb der Venturier (das seind
Kriegsflent on Sold / die auff ain gut glück ziehen) dero ain
grosse anzal wär / vnd täglich zu lieffen / vnd auch außge-
nomen / das man sagt von ainer versammlung bis in 20000.
verlaugneten Chüsten / maisten tails mit planckharnisch /
vnd mehr dann die helfft halb hacken schützen / vnd sein vil
die halb hacken haben mit zweyen vnd dreyen schüssen.

Darnach auff vnser frag der Armada halben / gaben sy
antwort.

Zu Constantinopel wären alter vnd newer Galeen 73.

Zu Gallipoli macht man Galeen 30.

Zu Synapoli gegem grössern Meer Galeen 35.

Zu Galan / gegen Gallipoli über / wären Galeen 44.

In Synap im grössern Meer seyen Galeen 54.

Der freyen Corsaren Susten 308.

Gewaffnet Galeen des Barbarossa / sampt etlichen ges-
wassneten Susten 46.

Die ihenigen / denen erlaubt was vom grossen Türcken
zu Armiren in Natalien / Metalin / Rhodis vnd an-
derer ort 100.

Flöß die gewaffneten pferdt über zufüren 200.

Flöß die wegen über zufüren / die zu Valona gemacht
werden 250.

Im grössern Meer hatt der Türck geordnet / das alle die
selbe Schiff ketten geben denen die jr bedörffen / vnd für-
sehung thäten mit Kriegsvolck / vnd das menigklich gerüst
sein solt zu end des Februarij / der ain grosse anzal sein wür-
det Munition zufüren.

Dergleichen ist fürgenömen in Natalien zur fürderung
der Armada / vnnnd hat der groß Türck schreiben lassen / in
Natalien vmb 40000. Galioten die am Ruder ziehen.

In Romania vnd Morea 20000. Galioten verordnet.
Vnd alle Galeen vnd Schiff / groß vnd klein / lang vnd
kurtz / sollen fertig sein auff gemelte zeit / also das man acht /
das inn vil jaren nit seyen gesehen worden im Meer so vil
Segel armirt mit Artlery allerlay sort / mit Munition dar
zū gehörig / mit Kriegßvolck vnd aller anderer ains solchen
heerzugs notdurfft.

Zū Constantinopel hat man fürsehüg gethon mit 4000.
Camelen / die werden den weg nemen auff Valona / Mu-
nition zum geschütz zutragen / vñ waren bereit des merern
theils auf den weg / ye ain Camel mit 150. in 200. Büchsen
Kugeln / oder puluers souil gewichts.

Des Barbarossa Armada was verfertigt / vnd zum tail
zū Galliopoli bliben / die andern soltē faren in Negropont
auff Italien.

Man sagt das der groß Türck vor endung des Jenner
zū Constantinopel nit verrücken werd / biß er alle sachen
verordnet hab / alles Kriegßvolck zū Andinopel zū ver-
sammeln / vnd das verrücken hab lassen / mit solcher Armada
aigner person inn Apulien zuziehen / vnnnd das er 80000.
Venturir zusammen bracht hab.

Vnd wirdt gesagt / das er ain Venedischen Gentilumen
mit namen Johan Francisc Justinian / sampt dem Bassa
Solymann abgefertigt hab auff Chair / vnnnd von dannen
gen Swessa / alle derselben Land / Galeen vnd Fusten zu-
samen zubringen / auff die gegent der Juden auff dem Ro-
ten Meer zuziehen / des Königs von Portugal paß zūver-
schliessen.

Vnnsere Herr: Jesus Christus wöll den Türcken jr mache
brechen / vnnnd vns helfen / Sunst gewartet die Christen

hait grösser schäden/fürnämlich aber Italia. Ich verhoff
kurglich zu Ewer Herrschafft zukommen / dann yederman
fleucht soichthalben. Weyter hab ich diß mals nichts zu
schreiben. Geben zu Tarant / den 16. Februarij / Anno
M.D. xxxvij.

Schreiben auß Ragusa. xxiiij. Februarij
Anno. M. D. xxxvij.

Der Türck sol den zwelfften tag Aprilis in erscheynung
des newen Mons sein Bariona / das ist Osterliches
Fest zu Andinopel halten / vnnnd darnach gen Constanti-
nopel ziehen / sich zum außzug wider die Chrusten gefast zu
machen / vnd soll dem Juden Coisaro 20. Galeen vnterge-
ben haben auff Sicilien zustraffen etc.

Vnd wie man sagt / hat sich der Sophi mit den Georgia-
nern verbunden / dem Türcken ins land zu fallen.

Der Barbarossa sol vielley zeit gefährlich tranck sein wor-
den / etlich sagen in gar tod.

Handwritten text, likely bleed-through from the reverse side of the page. The text is written in a medieval Gothic script and is oriented upside down relative to the page's current orientation.

Epistola ad Romanos
Capitulum 11. 1. 2.

Handwritten text in a medieval Gothic script, likely bleed-through from the reverse side of the page. The text is oriented upside down relative to the page's current orientation.

85-16. 26



R 96 / 1659

202, 207, 349, D

